

De graute Onkel Max

von Sigrun Sachs, in Lippsk Platt von Werner Zahn



Do es eun lüttken Bengel, de heut Oskar. Heu es eun bettken anners os süine Kaniuten, stille un düht bange. Heu will nich iut´er Rüijje danzen. Teo Hius foillt heu sick hirrsk, do kenne heu olles. Süine Öllern un Grautöllern sächt jümmer: „Diu bäst ganß un gor normal, diu bäst niu mol seo op de Welt kumen met diunem eunen ganß langen Diumen. Annere Kinner hääben eune ganß lange Nesen eoder affsteuhige Auern eoder raute Hoore. Un wüi hääbet düi leuw, seo wo diu bäst!“

Dat begreipt heu jo, öber in´ne Scheolen.....

Olle Kinner keiket blaus up süinen Diumen, de Mekens grienet un maket sick drollig doöber – dat es schlemm!

De eunen Dag goht süine Modder met äne teo´n Doktor. De Doktor satt achter süinen Schrüiwdesken, un Oskar vertellt äne met vell Trainen: „Niu hat et eun Enne, de lange Diumen mot aff! Eck will nich eun Kröppel süin, un auk nich eun Ape, den seu olle iutgneusen.“

„Weust diu, dat de Diumen teo´n Grüipen es?“

Oskar probeuert dat Grüipen, un dat geiht ollemol. „Wenn de halwe Diumen affschnüit es, dänne goht dat nich mahr, eoder?, froge Oskar. De Doktor nickkoppt. „Niu sin man nich bedroiwet, dat giff Saken, de vell schlemmer sin.“

Heu halt eunen Feot unner den Deske wäg, taug den Schoeh iut un auk den Strump. Oskar kreijt ganß graute Aogen. Nei, dat kann heu nich läuwen! De Doktor hät eunen düiht „grauten Onkel“. „Eck hääbe äne Max noimet“, sächt de Doktor un gneuse. Heu teut ne Trecken hariut, un do es eun Kasten met vell lüttke Wullmüssen inne, just seo wo för eune Barbiepuppe. Heu halt eunen Stift iut süine Tasken un malet sick eun Smiley up den Feotnagel van süinen „grauten Onkel“, dänne nimmt heu eune Müssen met eunen rauten Bommel un sett seu doöber. Dat seut seu lustig iut, dat Oskar liut lachen mott.

„Doktor, molst diu müi auk seowat up müinen Diumen?“ – „Klor!“ Dänn malet heu Oskar eun lustiges Gesichte up süinen Diumnagel, un denn kreijt heu auk nau eune bunte Müssen dorup.

„Tja“, sächt de Doktor, „diu häst dat bätter os eck. Eck mot jo tweu unnerschiedlich graute Scheoh kaupen, dat es dür! Düine Modder stricket düi wol för düinen Diumen de scheunsten Müssen un de koste nicks!“